

Goikoetxea Ertzaintzako sarjentu nagusia tirokatu egin dute Bilbon

«Koma arreflexiboan» dago Basurtoko ospitalean buruan jasotako tiroaren ondorioz

Joseba Goikoetxea Asla Ertzaintzako sarjentu ohia larri zauritu zuten atzo goizeko zortziak eta laurdenetan izandako atentatuan. Jaurtikigai bakar batek buruan jo zuen belarriaren atzealdean eta sama aldean geratu zitzaion. Ertzaintzak eta alderdi politikoek ETari egotzi zioten atentatuaren eginkizuna.

INAKI URIARTE / BILBO

Joseba Goikoetxea Asla larri zauritu zen goizeko zortziak eta laurdenetan Bilboko Campo Volantinen gertaturiko atentatuan. Ordu horretan Ertzaintzako sarjentu nagusia, epaitegiek ezgaitua egun, zain zegoen Opel Vectra zuri batean Tivoli kaleko semaforoa berde jarri arte. Lekuak adierazi zuten, praka bakeroak eta anorak urdina janzten zituen gazte bizardun bat hurbildu zitzaion oinez eta tiro bi bota zizkion arma labur batez leihatila ondotik. Dirudien, tiro egin zuen gizonezkoaz gain emakumezko bat ere bazegoen toki berean.

Goikoetxeak tiro bakar bat jaso zuen ezkerreko belarriaren atzealdean, eta eskuin masailaren inguruan geratu zitzaion. Auto berean zihoan sarjentuaren semeak lehen tiroa entzundakoan kalera egin zuen jauzi eta ez zuen kalterik izan. Ambulantzian eraman eta hoge minutu geroago heldu zen Basurtoko ospitalera. Lehen azterketa medikoa egin eta



Goikoetxea ertzainari tiro egin zioten semaforo batean geldirik zegoela.

XOUSE SIMAL

gero, suspertze sailera igo zuten.

Ertzaintzako buruzagia, 42 urtekoa, ezkondua zegoen eta hiru seme-alaba zituen.

Burukide jeltzale eta ardura-dun publiko ugari hurbildu ziren egunean zehar larrialdi zerbitzuraino. Jose Alberto Pradera Bizkaiko diputatu nagusia, Josu Ortuondo Bilboko alkatea, Dimas Sañudo zinegotzi sozialista, Juan Maria Atutxa Barne sailburua eta Jose Manuel Martiarena sailburuordea ere bertan izan ziren. Burukide jeltzaleak ere goizetik hurbildu ziren. Lehen orduetatik aurrera Luis Maria Retolaza EAJren BBBko lehendakaria eta Ricardo Ansotegi EB-

Bko idazkaria bertaratu ziren, besteak beste.

OSO EGOERA LARRIAN

Basurtoko ospitaleak emandako agiri medikoak jakinarazi zuen Goikoetxea Asla koma arreflexiboan dagoela, midriasis bilateral arreaktiboa eta arnasketa artifiziala eta hipotermia zentralaz. Egunean zehar ez zuen aldaketa neurologikorik izan. Elektroentzefalograma bat egin ondoren bizi zerebralaren azterak erakusten zituen.

Ertzaintzako buruak zauri ugari zituen, bigarren saihets zerbikala hautsia; area hipodentsoa zehaztu gabea eskuineko ze-

rebeluan, infartu iskemikoak eragindakoa litekeena. Eriak zati metalikoak ditu belarri atzean, balak sartzean eragindakoak. Jaurtikigaiak samako eskuinaldean geratu zitzaion, azalpean. Oso Egoera larrian zegoen bart.

Iturri polizialek ETari egotzi zioten atentatua. Horrela izatekotan, ETak Ertzaintzako kide baten aurkako atentatua zuzenki egiten duen lehen aldia izango litzateke. Izan ere, Ertzaintzako superintendente zen Carlos Diez Arkotxa hil zuenean ETak azaldu zuen atentatu hori ez zegoela Ertzaintzako burukide baten aurka zuzendua, Armadako koronelaren aurka baizik.

Alderdi jeltzaletik Ertzaintzara

BILBO

■ Joseba Goikoetxea Asla 1951ko martxoaren 17an jaio zen Bilbon. Frankismoaren garaian sartu zen EAJn eta espetxetik pasatu ondoren alderdiko antolaketa ardura izan zen 1980era arte. Ondoren Ertzaintzan sartu eta sarjentu nagusi izatera iritsi zen. 1986tik 1993ra arte, Ertzaintzako informazio zerbitzua zuzendu du. Garaikoetxearekin ez-legezko entzuketengatik kargu publikorako inhabilitatu zuten arte. Une honetan, Justizia Ministerioak indulto eskaerari erantzuna ematearen zain dago, eta Informazio Zientzietako Fakultatean matrikulatu berria da.

Joseba Goikoetxea 1968an

hasi zen lanean EAJrentzat 'liberatu' gisa, hain zuzen liburuak eta diskoak banatzen zuen enpresa baten bidez. Urtetan Bizkaiko EAJko antolaketa ardura izanik, 1975ean atxilotu zuten eta DGSen torturatu zuten. Epaietan Xabier Arzalluz izan zuen abokatu. Hiru urteko espetxe zigorra ezarri zioten eta ia urtebete egin zuen Carabanchelgo espetxean amnistiatu zuten arte. 1980era arte EAJko antolaketa ardura izan zen.

'Berroci' taldearen osaketan lan egin ondoren Ertzaintzan sartu zen eta bertan zeregin garrantzitsuak izan ditu. Goikoetxeak Genaro Garcia Andoainekin eskuz esku lan egin zuen eta 1986an berekin batera parte hartu zuen



Joseba Goikoetxea.

Lucio Aginagalde bahitua askatzeko operazioan. ETako komandoarekin izandako tiroketan hil zen Garcia Andoain. Harrez geroztik, Ertzaintzako informazio unitate berezia (AVCS) osatu eta zuzendu zuen. Unitate horren buru izanik, Ertzaintzak ETaren kontra egindako polizi operazio nagusi guztietan esku hartu du. Adibidez, 1991ko abuztuan, Bilboko Etxebarria parkean egindakoa, non Juan Maria Ormazabal 'Turko' eta Alfonso Mentxak ertzaina hil ziren.

Egun, kargu publikorako inhabilitatua dago Garaikoetxeak jasan zituen telefono entzuketan zerikusia izateagatik eta Andoni Murelagak jasan zituen torturengatik auzipetuta.

«Lasaitasuna eta arrazionalitatea» eskatu du EBBk

BILBO

EAJko Euzkadi Buru Batzarak «oro har euskal nazionalismo demokratikoaren aurkakoa, eta zehazki, EAJren kontrakoa» iritzi zion Joseba Goikoetxea Asla ertzaina larri zauritu zuteneko atentatuari. Asteleheneroko bilera egin ondoren kaleratutako komunikatuan, «lasaitasuna eta arrazionalitatea» eskatu zituen EBBk «maitatuenaren kontrako erasoak jasan izanako eragindako aspektu emozionalari aurre egiteko». Hala ere, «zenbait balio eta esku-bideren defentsan tinkotasunari eta erabatekotasunari eustea» eskatu zuen EBBk.

Azkenik, HBko Mahai Nazionalari, KASi, ETari eta 'Egin' egunkariari «EAJren kontra atentatu duen osotasuna osatzea» leporatu zieten jeltzideek, eta «balorazio horretatik tratatuko ditugu aurrerantzean».

Jose Antonio Agiriano Gobernu Zentralaren ordezkariaren esanetan, «basatia» izan da atzoko atentatua. Bere ustez gainera, ez da bereizketarik egin behar biktima Ertzaintzako kidea delako. «Biktima guztiak berdinak dira, herriarrak izan, Estatuako Segurtasun Indarretako kide izan, edo Ertzaintzakoak izan» esan zuen Agirianok.

HBk Ertzaintzaren «dinamikaz»

gogoeta egiteko eskatu dio EAJri

DONOSTIA

Euskal Herriaren eta Estatu espainarraren arteko gatazkaren ondorio izan da. HBren ustez, Joseba Goikoetxearen kontrako atentatua. «Gatazka horretan Ertzaintza, EAJren erabaki politiko, Estatuaren estrategiaren eskutan jarri nahi dute, gure herriaren errebindikazio politikoen kontra lehen mailako elementu errepresibo bihurtuz», azaldu zuen HBk prentsa ohar batean. Ertzaintzako sarjentuaren kontrako atentatuaren ostean, gatazkaren benetako arrazoia «desbideratu» egin nahi da HBren esanetan, «euskal herriarren arteko arazo bihurtuz».

HBk dei egin zion EAJri «gogoeta egin dezan eta Ertzaintzak aurrera daraman dinamika berrekin diezaion». Estatuari aurre egiteko «jarriera ausartagoa» hartzeko eskatu zion baita ere, «Euskal Herriak normalizazio politikoa lor dezan elkarriketa eta negoziazioaren alde eginez».